



Joint Council for
Qualifications

Canllaw i'r broses ystyriaeth arbennig

Cymwysterau Cyffredinol a Galwedigaethol

Mewn grym o 1 Medi 2019 ymlaen

Cynhyrchwyd ar ran:



Cynnwys	Tudalennau
Manylion Cyswllt	2
Pennod 1 Beth yw ystyriaeth arbennig?	3
Pennod 2 Pa ymgeiswyr fydd yn gymwys ar gyfer ystyriaeth arbennig?	4-5
Pennod 3 Ymgeiswyr sy'n bresennol ar gyfer yr asesiad ond sydd dan anfantais	6-7
Pennod 4 Ymgeiswyr sy'n absennol o gydran/uned ar yr amserlen am resymau derbyniol	8-9
Pennod 5 Materion eraill	10-11
Pennod 6 Prosesu ceisiadau am ystyriaeth arbennig (Cymwysterau TGAU a TAG)	12-14
Pennod 7 Addasiadau ar ôl yr asesiad Ystyriaeth arbennig – cymwysterau galwedigaethol	15-16

Manylion Cyswllt:

AQA

Ffôn: 0800 197 7162

Gwefan: www.aqa.org.uk

CCEA

Ffôn: 02890 261 200

Gwefan: www.ccea.org.uk

Pearson

Ffôn: 0344 463 2535

Gwefan:

<http://qualifications.pearson.com>

City & Guilds

Ffôn: 020 7294 2772

Gwefan: www.cityandguilds.com

OCR

Ffôn: 01223 553 998

Gwefan: www.ocr.org.uk

WJEC/CBAC

Ffôn: 02920 265 000

Gwefan: www.cbac.co.uk

Rhaid mynegi pob ymholiad ynghylch ystyriaeth arbennig i'r corff dyfarnu perthnasol yn hytrach na'r Cyd-gyngor Cymwysterau (JCQ). Ni chaiff y Cyd-gyngor Cymwysterau ymdrin ag ymholiadau ynghylch ystyriaeth arbennig.

Mae unrhyw newidiadau a wnaed i gynnwys y ddogfen hon ers y fersiwn flaenorol (1 Medi 2018 hyd at 31 Awst 2019) wedi'u huwcholeuo fel eu bod yn haws eu gweld.

Pennod 1

Beth yw ystyriaeth arbennig?

Ystyriaeth arbennig yw addasiad ar ôl arholiad i farc neu radd ymgeisydd er mwyn adlewyrchu salwch dros dro, anaf dros dro neu ryw ddigwyddiad arall y tu allan i reolaeth yr ymgeisydd ar adeg yr asesiad, sydd wedi cael effaith sylweddol, neu sy'n debygol o fod wedi cael effaith sylweddol ar allu ymgeisydd i gymryd asesiad neu i ddangos ei lefel arferol o gyrhaeddiad mewn asesiad.

Dim ond rhywfaint o gymorth byddai ystyriaeth arbennig i ymgeiswyr a allai fod wedi'u heffeithio gan amrywiaeth eang o anawsterau posibl, rhai emosiynol neu gorfforol, ac a allai fod wedi dylanwadu ar berfformiad yn ystod arholiadau. Ni all gael gwared ar yr anhawster y mae'r ymgeisydd yn ei wynebu. Bydd sefyllfaoedd lle na ddylid cofrestru ymgeisydd ar gyfer arholiad. Dim ond mân addasiadau y gellir eu gwneud i'r marc a ddyfernir oherwydd byddai gwneud mwy na hyn yn peryglu safon yr arholiad.

Mae gofynion sylfaenol ar gyfer graddio uwch mewn achosion o absenoldeb derbyniol (gweler Pennod 4, adran 4.3, tudalennau 8 a 9).

Mae pob arholiad yn mesur yr hyn y mae'r ymgeisydd yn ei wybod ac yn gallu ei wneud. **Rhaid i'r graddau cyffredinol a ddyfernir adlewyrchu'r lefel cyrhaeddiad a ddangoswyd yn ystod yr arholiad(au).** Nid yw'r graddau a ddyfernir o reidrwydd yn adlewyrchu gwir lefel yr ymgeisydd o ran gallu os effeithiwyd ar y lefel cyrhaeddiad yn sylweddol dros gyfnod hir.

Pan fo amgylchiadau tymor hir wedi atal yr ymgeisydd rhag cyrraedd y safonau cymhwysedd, efallai na fydd gwneud addasiad yn bosibl.

Pennod 2

Pa ymgeiswyr fydd yn gymwys ar gyfer ystyriaeth arbennig?

Rhaid gwneud cais am ystyriaeth arbennig yn dilyn cyfres arholiadau penodol.

- 2.1 **Bydd ymgeiswyr yn gymwys ar gyfer ystyriaeth arbennig os ydynt wedi cael eu paratoi'n llawn ac wedi astudio'r cwrs cyfan, ond bod eu perfformiad yn ystod yr arholiad, neu wrth lunio gwaith cwrs neu asesiad di-arholiad wedi cael ei effeithio'n sylweddol gan amgylchiadau andwyol y tu hwnt i'w rheolaeth.** Mae'r rhain yn cynnwys:
- 2.1.1 salwch dros dro neu ddamwain/anaf **ar adeg yr asesiad**;
 - 2.1.2 profedigaeth **ar adeg yr asesiad** (pan fo grwpiau cyfan wedi cael eu heffeithio, dim ond y rhai sydd agosaf fydd yn gymwys fel arfer);
 - 2.1.3 argyfwng domestig yn digwydd **ar adeg yr asesiad**;
 - 2.1.4 aflonyddwch difrifol **yn ystod arholiad**, yn arbennig pan fo deunydd wedi'i recordio yn cael ei ddefnyddio;
 - 2.1.5 digwyddiadau damweiniol **ar adeg yr asesiad**, megis derbyn y papur arholiad anghywir, derbyn papur arholiad neu CD diffygiol, offer ymarferol yn methu, deunyddiau'n methu â chyrraedd ar amser;
 - 2.1.6 cymryd rhan mewn **digwyddiadau chwaraeon, gwersylloedd hyfforddi neu gystadlaethau eraill ar lefel ryngwladol ar adeg yr asesiad**, e.e. cynrychioli eu gwlad ar lefel ryngwladol mewn gemau pêl-droed neu hoci;
 - 2.1.7 y ganolfan yn methu â gweithredu **trefniadau mynediad a gymeradwywyd yn flaenorol ar gyfer y gyfres arholiadau penodol honno**.
- 2.2 Pan fo ymgeiswyr wedi'u paratoi'n llawn ar gyfer y fanyleb, ond dewiswyd y testunau anghywir, gellir rhoi ystyriaeth arbennig yn ôl disgrisiwn y corff dyfarnu.

Hysbysir canolfannau mai nhw sy'n gyfrifol am sicrhau bod y testunau cywir yn cael eu haddysgu. Pan nad yw hyn wedi digwydd, ni ellir rhoi unrhyw sicrwydd y bydd ymgeisydd yn cael ystyriaeth arbennig. Bydd y corff dyfarnu'n ymchwilio i achosion o'r fath ar sail achosion unigol.

Pan fo'r testunau anghywir wedi cael eu haddysgu, mae'n hanfodol bod y testunau a astudiwyd wedi cael eu harholi yn y fanyleb gyfredol yn ystod cyfres arholiadau flaenorol.

- 2.3 **NI fydd ymgeiswyr yn gymwys ar gyfer ystyriaeth arbennig** os bydd y gwaith paratoi ar gyfer yr arholiad, neu'r perfformiad yn ystod yr arholiad wedi ei effeithio gan:
- 2.3.1 salwch tymor hir neu anawsterau eraill yn ystod y cwrs gan effeithio ar amser adolygu, **oni bai bod y salwch neu'r amgylchiadau'n dod i'r amlwg ar adeg yr asesiad**;
 - 2.3.2 profedigaeth yn digwydd dros chwe mis cyn yr asesiad, **oni bai bod yr asesiad yn cael ei gynnal ar yr union ddyddiad, neu os oes goblygiadau parhaus**, megis cwest neu achos llys;
 - 2.3.3 anghyfleustra domestig, megis symud tŷ, diffyg cyfleusterau, cymryd gwyliau (**gan gynnwys ymweliadau ysgol/cyfnewid a theithiau maes**) ar adeg yr asesiad;
 - 2.3.4 mân aflonyddwch yn yr ystafell arholi a achoswyd gan ymgeisydd arall, megis ymddygiad gwael am ennyd neu ffôn symudol yn canu;
 - 2.3.5 canlyniadau cyflawni trosedd, pan fo wedi'i gyhuddo'n ffurfiol neu wedi'i ganfod yn euog; (Fodd bynnag, gellid ystyried cais ôl-weithredol ar gyfer ystyriaeth arbennig os gollyngir y cyhuddiad yn ddiweddarach neu os bydd yr ymgeisydd yn cael ei ddyfarnu'n ddiuog.)
 - 2.3.6 canlyniadau cymryd alcohol neu gyffuriau adloniant;
 - 2.3.7 canlyniadau torri rheoliadau mewnol y ganolfan;
 - 2.3.8 methiant y ganolfan i baratoi ymgeiswyr yn briodol ar gyfer yr arholiad am ba reswm bynnag;
 - 2.3.9 prinder staff, gwaith adeiladu neu ddiffyg cyfleusterau;
 - 2.3.10 camddarllen yr amserlen a/neu fethu â mynychu'r lle cywir ac ar yr amser cywir;
 - 2.3.11 camddarllen cyfarwyddiadau'r papur cwestiynau ac ateb y cwestiynau anghywir;
 - 2.3.12 gwneud trefniadau personol, megis priodas neu drefniadau gwyliau sy'n gwrthdaro ag amserlen yr arholiadau;
 - 2.3.13 peidio â chyflwyno unrhyw waith cwrs neu asesiad di-arholiad o gwbl, oni bai bod gwaith cwrs neu trefnir asesiad di-arholiad am gyfnod cyfyngedig o amser, yn hytrach nag yn ystod y cwrs;
 - 2.3.14 methu pob arholiad a chydrannau/unedau a asesir yn fewnol;
 - 2.3.15 methiant i ddilyn y cwrs yn llawn o ganlyniad i ymuno â'r dosbarth ran o'r ffordd drwyddo;
 - 2.3.16 anabledd neu anawsterau dysgu (boed diagnosis wedi'i roi neu beidio), oni bai bod y salwch yn effeithio ar yr ymgeisydd **ar adeg yr asesiad**, neu pan fo'r anabledd yn gwaethygu'r hyn a fyddai fel arall yn broblem ddibwys – (**anawsterau ychwanegol i'r rhai y byddai'r trefniadau mynediad a gymeradwywyd yn flaenorol wedi'u lleddfu**);
 - 2.3.17 methiant y ganolfan i brosesu trefniadau mynediad erbyn y dyddiad cau swyddogol.

Pennod 3

Ymgeiswyr sy'n bresennol ar gyfer yr asesiad ond sydd o dan anfantais

- 3.1 Rhoddir ystyriaeth arbennig fel arfer trwy osod lwfans marciau i bob cydran a effeithiwyd mewn manyleb. Mae maint y lwfans yn dibynnu ar amser, natur, a hyd a lled y salwch neu anffawd. Bydd uchafswm y lwfans a roddir yn 5% o gyfanswm y marciau crai sydd ar gael yn y gydran dan sylw, gan gynnwys /gwaith cwrs/asesiad di-arholiad.
- 3.2 Bydd y penderfyniad y mae'r corff dyfarnu'n ei wneud yn seiliedig ar ffactorau amrywiol sy'n gallu amrywio o'r naill bwnc i'r llall. Gall y rhain gynnwys:
- difrifoldeb yr amgylchiadau;
 - dyddiad yr arholiad mewn perthynas â'r amgylchiadau; ac
 - natur yr asesiad, e.e. p'un a yw'n effeithio ar bapurau ysgrifenedig yn hytrach na gwaith cwrs/asesiad di-arholiad, neu p'un a yw'n ymwneud â Phrawf Ymarferol neu Brawf Siarad.
- 3.3 **Ni ellir cymhwyso ystyriaeth arbennig mewn modd cronus.** Er enghraifft, ar sail argyfwng domestig ar adeg yr arholiad **a'r** ymgeisydd yn dioddef o salwch firol.

Dylai ymgeiswyr neu eu rhieni/gofalwyr, yn y lle cyntaf, drafod cais ystyriaeth arbennig gyda'r ysgol neu'r coleg dan sylw.

Rhaid i ymgeiswyr preifat gysylltu â'r ysgol neu'r coleg a gyflwynodd gofrestriadau ar eu rhan i wneud cais am ystyriaeth arbennig.

Rhaid i'r enghreifftiau o amgylchiadau canlynol fod yn berthnasol ar adeg yr asesiad.

5% Dyma uchafswm y lwfans, a bydd yn cael ei neilltuo ar gyfer yr achosion mwyaf eithriadol, megis:

- salwch angheuol yr ymgeisydd;
- salwch angheuol rhiant/gofalwr;
- marwolaeth aelod o'r teulu agos **o fewn dau fis** o'r arholiad;
- argyfwng/digwyddiad aflonyddgar a difrifol iawn **ar adeg yr arholiad neu'n agos at hynny.**

4% Problemau difrifol iawn, megis:

- ymgeisydd neu aelod o'r teulu agosaf â salwch sy'n bygwth bywyd;
- llawdriniaeth fawr **ar adeg yr arholiad neu'n agos at hynny;**
- clefyd difrifol;
- marwolaeth ddiweddar iawn aelod o'r teulu estynedig;
- anaf corfforol difrifol neu barhaol yn digwydd **ar adeg yr arholiad;**
- argyfwng/digwyddiad difrifol **ar adeg yr arholiad.**

D.S. Diffinnir 'diweddar iawn' fel cyfnod o fewn un mis i'r arholiad(au).

3% Categori mwy cyffredin, (bydd mwy o achosion yn perthyn i'r categori hwn) gan gynnwys:

- profiad trawmatig **diweddar** megis marwolaeth ffrind agos neu berthynas pell;
- salwch **diweddar** o natur fwy difrifol;
- cyflyrau cynhenid/meddygol difrifol neu gyflwr seicolegol yn gwaethygu;
- braich neu goes wedi torri;
- clefyd organau;
- trawma ymosodiad corfforol cyn arholiad;
- argyfwng/digwyddiad diweddar;
- bod yn dyst i ddigwyddiad sy'n peri gofid **ar ddiwrnod** yr arholiad.

D.S. Diffinnir 'diweddar' fel cyfnod o bedwar mis cyn yr arholiad(au).

2% Y categori mwyaf cyffredin o lwfans – bydd y rhan fwyaf o achosion yn perthyn i'r categori hwn:

- salwch **ar adeg yr arholiad**;
- braich neu goes wedi torri yn gwella;
- cyfergyd;
- effeithiau beichiogrwydd (**nid beichiogrwydd fel y cyfryw**);
- trallod mawr **ar ddiwrnod yr arholiad**; (**nid dim ond straen sy'n gysylltiedig â'r arholiad**)
- lwfans ar gyfer y **papur diwethaf** a wneir mewn diwrnod pan fo ymgeisydd wedi'i gofrestru ar gyfer **tri arholiad neu fwy wedi'u hamserlennu ar gyfer yr un diwrnod** a phan fo cyfanswm hyd y papurau hynny **dros 5 awr 30 munud (arholiadau TGAU)** neu **dros 6 awr (arholiadau TAG)**.

(Pan fo amser ychwanegol wedi'i ddefnyddio yn dilyn cymeradwyaeth ffurfiol, dylid cynnwys hyn yn y cyfrifiad.)

(**Rhaid peidio** â chynnwys egwylliau gorffwys dan oruchwyliaeth yng nghyfanswm hyd y papurau wrth wneud cais am ystyriaeth arbennig.)

1% Wedi'i neilltuo ar gyfer problemau llai:

- sŵn yn ystod arholiad am gyfnod hir;
- salwch ymgeisydd arall sy'n arwain at aflonyddwch yn yr ystafell arholi;
- straen neu bryder y mae meddyginiaeth wedi'i rhagnodi ar ei gyfer;
- clefyd y gwair **ar ddiwrnod** yr arholiad;
- ychydig o anrhefn yn deillio o broblemau gweinyddol.

Pan fydd y cais yn methu â bodloni'r meini prawf, bydd yn cael ei wrthod.

Pennod 4

Ymgeiswyr sy'n absennol o gydran/uned a amserlennwyd am resymau derbyniol

- 4.1 Pan fydd ymgeisydd wedi colli cydran/uned ar yr amserlen am resymau derbyniol, a'r ganolfan yn barod i gefnogi cais am ystyriaeth arbennig, gellir gwneud addasiad i'r radd derfynol. **Fodd bynnag, rhaid bod wedi colli'r gydran/uned yn y gyfres derfynol a rhaid bodloni gofynion sylfaenol adran 4.3.**

Ni chaiff cyrff dyfarnu roi cyngor ynghylch a yw ymgeisydd yn addas i sefyll arholiad. Rhaid i staff y canolfannau ddilyn eu gweithdrefnau mewnol ar gyfer ymdrin ag ymgeiswyr sy'n teimlo'n sâl ar ddiwrnod yr arholiad.

- 4.2 **Ar gyfer arholiadau unedol a wneir yn ystod cyfres arholiadau cyn ardstyio, rhaid ailgofrestru ymgeiswyr ar gyfer unrhyw unedau a gollwyd yn ystod y cyfle asesu nesaf. Oni bai bod anawsterau'n codi, e.e. perfformiadau grŵp na ellir eu hailadrodd, ni roddir ystyriaeth arbennig.**

Mae'r egwyddor hon hefyd yn berthnasol pan fo carfanau cyfan yn colli unedau oherwydd tywydd garw neu am unrhyw reswm arall, neu pan fo ymgeiswyr unigol yn colli unedau o ganlyniad i newid canolfan.

Gofynion sylfaenol ar gyfer graddio uwch mewn achosion o absenoldeb derbyniol

- 4.3 Nodir y gofynion sylfaenol ar gyfer graddio uwch mewn achosion o absenoldeb derbyniol isod ac ar dudalen 9. Ym mhob achos, **rhaid i'r ymgeiswyr fod wedi'u paratoi'n llawn a bod wedi cwmpasu'r cwrs cyfan.**

Cymwysterau TAG UG a Safon Uwch: (AQA, OCR, Pearson a CBAC) rhaid bod wedi cwblhau o leiaf 25% o'r asesiad cyfan†.

Sylwer nad yw cwblhau unedau U2 neu UG yn rhannol yn dderbyniol.

- **Manylebau llinol UG: rhaid bod wedi cwblhau 25% o'r asesiad cyfan.**
- **Manylebau unedol UG: rhaid bod wedi cwblhau 25% o'r asesiad cyfan.**
- **Bydd ychwanegiadau a roddir ar lefel UG (manylebau unedol) yn cael eu trosglwyddo i Safon Uwch.**
- **Manylebau llinol Safon Uwch: rhaid bod wedi cwblhau 25% o'r asesiad cyfan.**
- **Dyfarniad chwe uned Safon Uwch (manylebau unedol): Rhaid i 25% o gyfanswm yr asesiad fod wedi'i gwblhau gydag o leiaf un uned A2 wedi'i chwblhau.**
- **Dyfarniad pedair uned Safon Uwch (manylebau unedol): Rhaid i 25% o gyfanswm yr asesiad fod wedi'i gwblhau gydag o leiaf un uned A2 wedi'i chwblhau.**
- **Ni roddir dyfarniad Safon Uwch (manylebau unedol) ar sail unedau UG yn unig.**

TGAU: (AQA, OCR, Pearson a CBAC)
rhaid bod wedi cwblhau 25% o'r asesiad cyfan†

†Ar gyfer CCEA TAG UG a safon uwch, a chymwysterau TGAU ,**rhaid** bod wedi cwblhau 40% o'r asesiad cyfan.

Projectau (yn cynnwys Project Estynedig): os nad yw project wedi'i gwblhau, ni ellir rhoi gradd.

Mewn amgylchiadau prin ac eithriadol iawn, mae gan gorff dyfarnu'r hawl i ddyfarnu gradd uwch ar ganran is. Mewn achosion o'r fath rhaid i'r ganolfan gysylltu â'r corff dyfarnu perthnasol.

Fodd bynnag, ni ellir dyfarnu os nad oes un o'r cydrannau/unedau o fewn manyleb wedi'i gwblhau.

Pennod 5

Materion Eraill

Tystysgrifau eraill

- 5.1 Pan fo ymgeisydd wedi cofrestru ar gyfer manyleb ac wedyn wedi marw, neu ag afiechyd angheuol ac nad yw'n gallu sefyll arholiadau/asesiadau, dylai'r ganolfan gysylltu â'r corff dyfarnu perthnasol. Bydd y corff dyfarnu'n cynghori'r ganolfan ynglŷn â'r broses a'r wybodaeth sy'n ofynnol.

Dylai canolfannau nodi, lle bo corff dyfarnu yn cyhoeddi tystysgrif anrhydeddus neu lythyr cydnabod, nad yw hyn yn ddyfarniad cymhwyster ac na fydd ganddo unrhyw werth academiaidd.

Estyniadau i waith cwrs/asesiad di-arholiad

- 5.2 Pan fo ymgeisydd yn bodloni'r meini prawf cyhoeddedig ar gyfer ystyriaeth arbennig, **h.y. salwch dros dro, anaf dros dro neu anhwylder arall cyn cyflwyno eu gwaith**, efallai y bydd yn bosibl caniatáu estyniad byr i'r dyddiad cau.

Byddai estyniad o ddim mwy na deg diwrnod i'r dyddiad cau ar gyfer cyflwyno gwaith o bosibl yn galluogi'r ymgeisydd i gwblhau ei waith. **Rhaid i'r ganolfan gysylltu â'r corff dyfarnu perthnasol i ofyn am y trefniant hwn.**

Diffyg mewn gwaith (gwaith cwrs/asesiad di-arholiad)

- 5.3 Os yw ymgeisydd wedi dioddef salwch sydyn neu ryw anhap arall yn ystod cyfnod cynhyrchu'r gwaith, gall fod yn bosibl derbyn llai o waith heb gosb mewn rhai pynciau. **Fodd bynnag, rhaid bod wedi ymdrin â'r holl amcanion asesu o leiaf unwaith.** Ni fydd yn bosibl gwneud hyn os mai dim ond un darn mae'r fanyleb yn gofyn amdano.

Pan fo angen sawl darn o waith, dim ond os yw'r darnau hynny'n profi'r un meini prawf y bydd y gostyngiad yn cael ei dderbyn. **Ni fydd modd ystyried hyn ym mhob achos. Er enghraifft, os na chyflwynwyd gwaith, os nad yw'r amcanion asesu wedi'u bodloni, neu os ymunodd yr ymgeisydd â'r cwrs yn hwyr.**

Ni ddylai'r ganolfan wneud unrhyw newid i'r marciau. Dylid cyflwyno **Ffurflen 10 – JCQ/SC†** i'r corff dyfarnu ynghlwm wrth grynodedeb o'r marciau ar draws yr amcanion asesu.

Rhaid i'r ymgeiswyr fod wedi'u paratoi'n llawn am y cwrs ond nad oeddent wedi gallu gorffen y gwaith. Ni fydd cyrff dyfarnu fel arfer yn cytuno o flaen llaw i lai o waith cwrs gael ei gyflwyno.

† Ni ddylai canolfannau AQA ac OCR gyflwyno Ffurflen 10 – JCQ/CB.

Rhaid cyflwyno ceisiadau ar-lein gan ddefnyddio e-AQA neu OCR Interchange fel y bo'n briodol.

Gwaith sy'n cael ei golli neu ei ddifrodi (cydrannau asesu di-arholiad)

- 5.4 Mae manylion pellach i'w cael yng nghyhoeddiad y CGC *Cyfarwyddiadau ar gynnal asesiadau di-arholiad* -
<https://www.jcq.org.uk/exams-office/non-examination-assessments>

Problemau eraill

- 5.5 Mae yna amgylchiadau sy'n codi trwy ddamwain, a gall fod angen cyngor gan arbenigwr. Er enghraifft, pe rhoddir papur cwestiynau anghywir i'r ymgeisydd neu os yw papur cwestiynau'n ddiffygiol mewn rhyw ffordd; megis tudalen wedi'i hargraffu'n anghywir.

Mewn achosion o'r fath, rhoddir ystyriaeth arbennig trwy ddulliau gwahanol i'r rhai a nodwyd hyd yma. Efallai y bydd angen eu cyfeirio at swyddog pwnc neu arholwr profiadol ar gyfer gwneud penderfyniad ar bwnc penodol o ran sut y dylid dyfarnu ystyriaeth arbennig. Mae hyn yn golygu ei bod yn bosibl na fydd y canlyniadau'n dangos yr ychwanegiad ar unwaith. Efallai fod y marciau wedi'u haddasu i ystyried y broblem a gododd.

- 5.6 Efallai nad yw canolfannau'n sylweddoli bod ymgeisydd wedi cael papur cwestiynau anghywir. Bydd cyrff dyfarnu'n hysbysu canolfannau o unrhyw anghysondebau. Os yw'r ganolfan yn ymwybodol o'r camgymeriad ar adeg yr arholiad, dylid rhoi'r papur cwestiynau cywir i'r ymgeisydd, lle bo'n bosibl, cyhyd â'i fod ef/ bod hi'n parhau i fod dan oruchwyliaeth y ganolfan, ac yn gallu parhau â'r arholiad.

Dylid cyflwyno cais am ystyriaeth arbennig i'r corff dyfarnu perthnasol pan fo'r papur anghywir wedi'i gymryd, a phan fo'r papur cywir wedi'i roi yn lle'r papur anghywir, a'r ymgeisydd wedi cymryd y ddau. Mae yna amgylchiadau lle nad yw'n bosibl i gorff dyfarnu roi ystyriaeth arbennig i ymgeiswyr sydd wedi rhoi cynnig ar bapur anghywir.

- 5.7 Pan fo ymgeiswyr wedi cymryd yr aseiniad gwaith cwrs neu asesiad di-arholiad anghywir, gall y ganolfan gyflwyno cais am ystyriaeth arbennig os nad oes modd cofrestru ymgeiswyr yn ystod y cyfle asesu nesaf. Mae yna amgylchiadau lle nad yw'n bosibl i gorff dyfarnu roi ystyriaeth arbennig i ymgeiswyr sydd wedi rhoi cynnig ar gydran asesiad di-arholiad anghywir.

Pennod 6

Prosesu ceisiadau am ystyriaeth arbennig (Cymwysterau TGAU a TAG)

Ceisiadau ar-lein am ystyriaeth arbennig

- **Rhaid prosesu ceisiadau am ystyriaeth arbennig ar gyfer cymwysterau AQA, OCR, Pearson, a TAG a TGAU CBAC ar-lein.**
- **Rhaid gwneud ceisiadau ar-lein ar gyfer arholiadau ysgrifenedig wedi'u hamserlennu. Ni chaiff ffurflenni papur eu derbyn.**
- Gwneir ceisiadau ar-lein am ystyriaeth arbennig trwy e-AQA, CCEA SpC Online, Edexcel Online, OCR Interchange a Gwefan Ddiogel CBAC.
- Yn y rhan fwyaf o achosion, bydd y system ar-lein yn rhoi penderfyniad ar unwaith.
- **Ar gyfer AQA ac OCR, rhaid i ganolfannau hefyd wneud ceisiadau ar-lein pan fo problemau gyda chydrannau/unedau a asesir yn fewnol, megis gwaith cwrs ac asesiadau di-arholiad, ac mewn achosion sy'n cynnwys grwpiau o ymgeiswyr. Ni chaiff ffurflenni papur eu derbyn gan AQA, CCEA ac OCR.**
- Pan fo ymgeisydd yn bresennol ond dan anfantais ar gyfer arholiad ysgrifenedig wedi'i amserlennu, gellir gwneud cais ar-lein ar gyfer yr holl gydrannau oedd wedi'u heffeithio unwaith y bydd yr arholiadau drosodd neu unwaith y bydd yr ymgeisydd wedi dod ato'i hun; pa un bynnag sy'n digwydd gyntaf. Nid oes angen gwneud ceisiadau ar wahân ar gyfer arholiadau unigol.
- Pan fo ymgeisydd yn bresennol ond dan anfantais ar gyfer arholiad ysgrifenedig wedi'i amserlennu, bydd cyfran o achosion yn cael eu samplu gan gorff dyfarnu er mwyn sicrhau ansawdd. Efallai y bydd corff dyfarnu yn gofyn i ganolfan ddarparu dystiolaeth wedi'i llofnodi, **a luniwyd gan aelod o'r uwch dîm arweinyddiaeth i gefnogi cais. Rhaid i'r ganolfan gadw tystiolaeth yn cefnogi cais ar-lein am ystyriaeth arbennig tan ar ôl cyhoeddi'r canlyniadau.**
- Pan fo ymgeisydd yn absennol o arholiad am reswm derbyniol, mae angen gwneud cais ar wahân ar gyfer pob diwrnod y collir arholiadau.
- Pan fo ymgeisydd yn absennol o arholiad am reswm derbyniol, bydd cyfran o achosion yn cael eu samplu gan gorff dyfarnu er mwyn sicrhau ansawdd. Efallai y bydd corff dyfarnu yn gofyn i ganolfan ddarparu tystiolaeth wedi'i llofnodi, **a luniwyd gan aelod o'r uwch dîm arweinyddiaeth i gefnogi cais. Rhaid i'r ganolfan gadw tystiolaeth sy'n cadarnhau absenoldeb yr ymgeisydd o arholiad tan ar ôl cyhoeddi'r canlyniadau.**

Ceisiadau ar bapur

- 6.1 **Rhaid** cyflwyno **Ffurflen 10 – JCQ/SC** pan fo corff dyfarnu'n nodi'n benodol bod angen cyflwyno cais ar bapur. Rhaid i bennaeth y ganolfan/swyddog arholiadau gyflwyno un ffurflen fesul ymgeisydd a fesul pwnc. **Rhaid** i dystiolaeth briodol a chyfredol gefnogi'r cais am ystyriaeth arbennig. **Rhaid llofnodi Ffurflen 10 – JCQ/SC; mae llofnod electronig yn dderbyniol. Ni fydd ceisiadau'n cael eu derbyn os cânt eu cyflwyno'n uniongyrchol gan rieni neu ymgeiswyr.**

Rhaid i ymgeiswyr preifat gysylltu â'r ysgol neu'r coleg a gyflwynodd gofrestriadau ar eu rhan i wneud cais am ystyriaeth arbennig.

- 6.2 **Ar ôl cyhoeddi'r canlyniadau**, dim ond dan yr **amgylchiadau mwyaf eithriadol** y bydd ceisiadau hwyr yn cael eu derbyn a **rhaid** eu **cyflwyno cyn y dyddiad cau ar gyfer ymholiadau ynghylch canlyniadau'r gyfres arholiadau briodol.**

Mae'n rhaid i aelod o'r uwch dîm arwain gynhyrchu dystiolaeth i gefnogi cais hwyr.

Dylai canolfannau nodi na ellir cyflwyno cais am ystyriaeth arbennig ar ôl cwblhau ymholiad ynghylch canlyniadau.

- 6.3 Gall aelod o'r uwch dîm arweinyddiaeth atodi llythyr o eglurhad i'r ffurflen pan fo'r amgylchiadau'n anarferol, neu pan fo'r ffurflen yn annigonol ar gyfer y sefyllfa benodol sydd wedi codi. Mewn rhai achosion, mae cyflwyno un ffurflen gyda llythyr eglurhaol yn briodol, ac atodi rhestr o ymgeiswyr sydd wedi cael eu heffeithio.
- 6.4 Nid yw'n bosibl i bob llythyr dderbyn ateb unigol. Mae'n bwysicach prosesu'r ceisiadau cyn cyhoeddi'r canlyniadau. Efallai na fydd cyrff dyfarnu'n gallu ymateb yn bersonol i bob cais unigol.

Ni anfonir llythyrau at ymgeiswyr a/neu rieni/gofalwyr y mae'n rhaid i'r ganolfan ymdrin â'r achosion.

Mae gan gyrff dyfarnu broses apelio gyhoeddedig ar gyfer penderfyniadau ynghylch ystyriaeth arbennig. Nodir y broses hon yng nghyhoeddiad CGC, *Canllaw i brosesau apelio'r cyrff dyfarnu* – <http://www.jcq.org.uk/exams-office/appeals/jcq-appeals-booklet>

Rhai enghreifftiau pan fo ystyriaeth arbennig yn briodol a phan nad yw'r briodol

Enghraifft 1

Mae ymgeisydd Blwyddyn 12 yn sefyll arholiadau cymwysterau TAG UG ym mis Mehefin 2020. Nid yw'r ymgeisydd yn gallu mynychu unrhyw un o'i arholiadau UG (Cemeg, Mathemateg a Ffiseg) oherwydd afiechyd. Bydd y ganolfan yn ei ail-gofrestru unwaith eto ar gyfer TAG UG Cemeg, Mathemateg a Ffiseg y cyfle asesu nesaf posibl – Mehefin 2021.

Enghraifft 2

Mae ymgeisydd yn methu dau bapur TGAU mewn un diwrnod, Cyfrifiadureg yn y bore ac Astudiaethau Crefyddol yn y prynhawn oherwydd afiechyd. Mae hi'n bodloni'r gofynion sylfaenol ar gyfer dyfarniad TGAU ym mis Mehefin 2020, ar ôl cwblhau dros 25% o'r holl asesiad yn y ddau bwnc TGAU. Mae'r ganolfan yn gwneud cais am ystyriaeth arbennig. Gan fod y ganolfan yn gwybod bod yr ymgeisydd wedi bod yn cael trafferth gyda'i hiechyd dros yr ychydig ddyddiau cyn hynny, nid oes angen iddyn nhw ofyn i'r ymgeisydd ddangos llythyr gan ei meddyg teulu. Gall y ganolfan ysgrifennu llythyr ategol i gadarnhau ei habsenoldeb o'r ddau bapur arholiad TGAU.

Enghraifft 3

Mae ymgeisydd yn sefyll arholiad TAG Safon Uwch Llywodraeth a Gwleidyddiaeth brynhawn dydd Iau. Mae'n hysbys ei fod yn cael trafferth gyda haint ar y frest ac yn y glust, ond eto i gyd, mae'n benderfynol o sefyll ei arholiad. Mae salwch yr ymgeisydd yn gwbl amlwg i'r tîm goruchwylio. Fodd bynnag, nid yw'r ymgeisydd yn gallu mynychu ei arholiad TAG Safon Uwch mewn Addysg Gorfforol y bore canlynol. Mae'n bodloni'r gofynion sylfaenol ar gyfer dyfarniad TAG Safon Uwch mewn Addysg Gorfforol gan ei fod eisoes wedi sefyll un papur yn gynharach yn yr wythnos. Mae'r ganolfan mewn sefyllfa i ysgrifennu datganiad yn cefnogi'r cais am ystyriaeth arbennig gan ei bod yn gwybod ei fod am fod yn sâl cyn iddo fod yn absennol o'r arholiad fore dydd Gwener.

Enghraifft 4

Mae ymgeisydd yn sefyll arholiad TGAU mewn Rwsieg brynhawn dydd Mawrth. Nid oedd unrhyw broblemau hysbys yn ystod yr arholiad ar y dydd Mawrth. Fodd bynnag, nid yw hi'n mynychu ei arholiad TGAU mewn Astudiaethau Cyffredinol fore dydd Mercher. Mae ei mam yn cysylltu â swyddfa'r ysgol ar fore'r arholiad Astudiaethau Cyffredinol i hysbysu am ei habsenoldeb oherwydd anhwylder. Nid oes tystiolaeth feddygol ar gael i gefnogi'r cais. Mae'r ganolfan yn cynghori'r rhiant i gwblhau rhan berthnasol **Ffurflen 14 – JCQ/ME** a mynd â hi wedyn i swyddfa'r ysgol. O dderbyn **Ffurflen 14**, mae'r ganolfan yn teimlo y gall gefnogi'r cais ac mae'n cyflwyno cais ar-lein am ystyriaeth arbennig. Mae'r Ffurflen 14 yn cael ei chadw yn ffeiliau'r ganolfan.

Enghraifft 5

Mae ymgeisydd yn sefyll arholiad TAG Safon Uwch mewn Seicoleg fore dydd Iau. Mae'n cael triniaeth ar gyfer salwch difrifol. Yn ddiweddar, rhagnodwyd meddyginiaeth ar gyfer yr ymgeisydd sy'n achosi sgil-effeithiau difrifol. Mae'r ymgeisydd yn sefyll ei arholiad TAG Safon Uwch mewn Seicoleg fel y trefnwyd, ond nid yw'n gallu sefyll ei arholiad TAG Safon Uwch mewn Drama a Theatr na'i arholiad Safon Uwch mewn Llenyddiaeth Saesneg sy'n weddill y diwrnod canlynol. Gall fodloni'r rheolau ar gyfer ystyriaeth arbennig gan ei fod wedi cwblhau 50% o'r fanyleb ar gyfer TAG Safon Uwch mewn Drama a Theatr a TAG Safon Uwch mewn Llenyddiaeth Saesneg. Mae'r ymgeisydd yn ymweld â'i feddyg teulu, ac oherwydd ei gwybodaeth am ei chlaf a'i gyflwr, mae'n fwy na pharod i lunio nodyn ar gyfer yr ysgol. Yn yr un modd, mae ei ysgol yn barod i ysgrifennu datganiad cefnogol.

Pennod 7

Addasiadau ar ôl yr asesiad – ystyriaeth arbennig (cymwysterau galwedigaethol)

7.1 Dyfarnu ystyriaeth arbennig – cymwysterau galwedigaethol

Bydd penderfyniad y corff dyfarnu i roi ystyriaeth arbennig mewn cymwysterau galwedigaethol wedi'i seilio ar wahanol ffactorau, a allai amrywio rhwng dysgwr a dysgwr a rhwng un asesiad a'r llall. Gall y ffactorau hyn gynnwys difrifoldeb yr amgylchiadau, dyddiad yr asesiad, a natur yr asesiad.

Mae'n bwysig nodi ei bod yn bosibl na ellir rhoi ystyriaeth arbennig pan fo:

- angen dangos cymhwysedd ymarferol ar gyfer asesu;
- rhaid bodloni'r meini prawf asesu yn llwyr;
- unedau/cymwysterau yn rhoi 'Trwydded i Ymarfer'.

Pan fo asesiad wedi'i gollu neu pan fo ar ffurf prawf ar gais, megis prawf electronig wedi'i osod a'i farcio gan gyfrifiadur, dylai'r ganolfan gynnig cyfle i'r dysgwr gymryd yr asesiad yn ddiweddarach.

Dylid ceisio cyngor y corff dyfarnu perthnasol.

7.2 Gwneud cais am ystyriaeth arbennig mewn cymwysterau galwedigaethol

Rhaid gwneud cais am ystyriaeth arbennig ar sail achosion unigol. **Rhaid** gwneud ceisiadau ar wahân ar gyfer pob dysgwr. Yr unig eithriad ar gyfer hyn yw pan fo grŵp o ddysgwyr wedi'u heffeithio gan amgylchiadau tebyg yn ystod asesiad, megis larwm tân. **Rhaid** atodi rhestr o ddysgwyr sydd wedi'u heffeithio ynghlwm wrth y cais.

Rhaid cyflwyno ceisiadau am ystyriaeth arbennig i'r corff dyfarnu perthnasol gan ddefnyddio **Ffurflen VQ/SC**.

Mae **Ffurflen VQ/SC** ar gael yn electronig ar:

<http://www.jcq.org.uk/exams-office/access-arrangements-and-special-consideration/forms>

Er mwyn sicrhau gweithdrefn brosesu ceisiadau effeithiol, **rhaid** i ganolfannau gyflwyno tystiolaeth i gefnogi'r cais hefyd. Er enghraifft, datganiad gan aelod o staff y ganolfan neu unrhyw wybodaeth briodol arall.

Rhaid i Bennaeth y Ganolfan/Uwch Arholwr/Prif Weithredwr awdurdodi pob cais am ystyriaeth arbennig.

Wrth brosesu cais, dim ond y ganolfan sy'n gwneud cais am ystyriaeth arbennig ar ran dysgwr y bydd corff dyfarnu yn cysylltu â hi.

Ni ystyrir rhoi ystyriaeth arbennig unwaith y bydd cyflawniad dysgwr wedi'i hawlio a'i ardystio.

7.3 Gwaith sy'n cael ei golli neu ei ddifrodi (gwaith wedi'i asesu'n fewnol)

Pan fydd gwaith dysgwr wedi'i golli neu ei ddifrodi, gall corff dyfarnu ystyried cais am ystyriaeth arbennig. Ym mhob achos, **rhaid** i'r ganolfan allu dilysu bod y gwaith wedi'i gwblhau a'i fod wedi cael ei fonitro wrth i'r ymgeisydd weithio arno.

Ar gyfer cymwysterau sy'n seiliedig ar gymhwysedd, rhaid i'r ganolfan gadw cofnodion asesu ar wahân i bortffolio'r dysgwr. Mewn achos o golli portffolio, gellir defnyddio'r cofnodion hyn, ynghyd â sesiynau holi ac ateb wedi'u dogfennu'n llawn neu ddatganiadau ysgrifenedig, fel y bo'n briodol, i gadarnhau cymhwysedd y dysgwr. Dylid dilysu portffolio wedi'i ail-greu, oherwydd bod tystiolaeth wedi'i cholli, yn fewnol.

Rhaid i'r ganolfan ddilyn gweithdrefnau cyhoeddedig y corff dyfarnu ar gyfer gwaith sy'n cael ei golli neu ei ddifrodi.

7.4 Tystysgrifau eraill

Dylid gwneud cais am dystysgrif anrhydeddus pan fo afiechyd angheuol ar ddysgwr neu os yw dysgwr wedi marw.

Rhaid ceisio cyngor gan y corff dyfarnu perthnasol a fydd yn hysbysu'r ganolfan o'r broses.

Dylai canolfannau nodi, lle bo corff dyfarnu yn cyhoeddi tystysgrif anrhydeddus neu lythyr cydnabod, nad yw hyn yn ddyfarniad cymhwyster ac na fydd ganddo unrhyw werth academaidd.